

РУСКИ НОВИНИ

„Руски Новини“ виходва каж...
двєнь. — Предплата на р.с. оо Дин.
Адреса: „Руски Новини“ Р. Керестур.

ЗА РУСИНОХ У ЈУГОСЛАВИЈИ

Видава: Руске Нар. Просв. Друштво
Редактор: Мих. ФИРАК.

В - И - С - Т - И

Немецка и Французка ше помирели.

Тото, на цо чекала цала Европа 20 роки по войны и од чого найвещей бул одвисни мир Европи — помирєнє медзи Немецку и Французку висцело ше 6. децембра у Паризу. У мену немецкей влади министер Рибентроп, а у мену французкей влади министер Боне подписали єдну вияву („декларацију“) у котрей Немецка зашведочела, же не дума однімац од Французкей ніяку жем и уобщє же нема од Французкей цо питац и же обидва держави буду жиц у мире и сушєдскей любви. Слава Богу, же зме то дочекали. Цали швет тераз оддихнє.

Приходзи шор на Польску.

Предняк польских Немцох Вианер придал польскей влади жаданя Немцох у Польскей, котри Польска мушу сполниц кед не сце да ю дочека доля Чехох. Меморандум ма 8 точки и барз слични жаданьом судетских Немцох, котри вони ставяли Чехом. — До Полякох вошол вельки страх. Вони слично як и Чехи гяяр крича, же ше не даю и же буду до остатней капки крєви браніц Галичину, бо то їх найвекше благо. Але то шицко дармо, кед ше лем почне ушорйовац питанє Немцох у Польскей, такой ведно в нїм муши ше розвязац питанє наших братох Русиных под Польску.

Медзи Италию и Французку заш не добре.

Талияне наместо да направя зос Французку споразум як цо направели зос Англию указали у остатних дньох апетит за островом Корзика, котри лежи у штредоземним морю недалєко Италиї а оддавна припада Французкей, гоч жителе того острова гуторя талиянски. Французи дзвигли вельку лярму проци галавних Талиянох. И так од їх споразума ваш не будзе ніч.

Цо Чехи страцели?

Конечни обрахунох двелїдби Чехословацкей випатра так: Чехи страцели 41.596 кв. килом. и 4,922.000 жительох и то: 2,854.000 Немцох, 1,162.000 Чехох и Словакох, 592.000 Мадярох, 37.000 Русиных, 78.000 Полякох и 60.000 Жидох. Ческа страцела шицкого єдну трєцину и жительства и жеми.

Терашня Ческо-словацко-руска держава ма 98.912 кв. км. и 10 мил. житељох, медзи нїма 750.000 Русиных. Але лем 550.000 Русиных су у своєй шлєбодней держави, а 200.000 су ище у Словацкей.

Думки о виборох.

Гоч зме не политични новини, але пред таку вельку и важну подїю як цо су державни виберанки, котри буду 11. децембра, мушине написац даскельо шори не за агитацију на хасен тей або гевтей странки, але да обьяшнїме цо знача вибори и як их треба вихасновац, же би од нїх було добра и за нас Русиных и за державу у котрей жиєме.

На виборох дана народу велька власц и право. Бо на виборох вибера народ своїх заступнїкох, котри маю з державу управяц, издавац закони и одредзовац шор и правду держави. Прето виберанки ше тичу каждого гражданина, тичу ше цалого його живота и треба зато виберац поважно и з розумом.

ГЛАСАЙМЕ НА ЧЕСНИХ ЛЮДЗОХ!

Кед до парламенту вибереме добрих и чесних людзох вец и закони, котри вони направя, буду добри и справедливи и на хасен шицких державлянох. А зли, не чесни, нерозумни и легкомислени заступнїци направя лем зли закони, котри буду на хасен лем даєдним людзом, а цалому народу лем на терху и чкоду. Бо так гвари св. Писание: »Не може добре древо родзиц зли плоди, ані зле древо не да добри плоди«.

А заш добри праведни и чесни человек не може бѹц тот, котри не поштує Бога и Церкву. То озда каждому ясно. Бо кед ше Бога не бої человек кого ше вец будзе бац? Зато свидоми Русин тиж не будзе гласац на людзох, котри далєко од вири и Бога а поготово не на таких, котри нашей вири процивни.

НЕ ВЕРЦЕ ОБЕЦУНКОМ!

Пред виберанками обично кандидати вельо обецую да прицагнѹ людзох. Паметайце: Хто вельо обеца тот мало лебо и ніч не дава! А найвекшу гаранцију же будзе добри и хасновити вам може дац кандидат, котрого познає, же є чесни, люби свой народ и же уж вельо доброго зробел а з тим баржей, кед зробел дацо доброго и за нас Русиных. Не шмеме патриц на странки але на тих, котри за нас до тераз уж вельо добра зробели, котри поштую руски народ лебо су и сами Русини!

НЕ ПРЕДАВАЙЦЕ САМИ СЕБЕ!

Найгорше цо ше на виберанкох може зробиц єст то, кед ше несвидоми неўки людзе даю предац. За даяки олдомаш, за погар напою идзе гласац и за найгоршого кандидата. Ніч не дума цо роби. Тот человек предава сам себе. Предава свой будуши живот. А не лем свой, але и своїх дзецох. Бо закони котри посланици одгласаю не зробени лем за єден дзєнь але за длу-

ги и за длуги роки. Не дайме, да на нашим мену остане чарна шпљяха, же Русин гласа пре олдомаш!

СВОЙОГО ПОСЛАНИКА МАЦ НЕ МОЖЕМЕ

На жаль гоч нас у Югославиї єст до 40.000 ипак ми так розшати, же по терашнім закону о виберанкох сами свойого посланика вибрац ніяк не можеме. Да зме шицки у єдним срезу, те ди би зме свойого посланика лєгко достали, але так док ми ані у срезу не маме векишину, не можеме вибрац Русина за посланика.

Прето можеме и мушине питац од вельких странкох и тих народох медзи котрима жиєме и зос котрима ведно гласаме, же би вони почитовали нашу руску народносц, нашу грекокатолицку виру и церкву и да нам поможу да вшадзи дойдзєме до своїх власних руских школах.

Тото треба да гледаю нашо людзе од кандидатох за котрих буду гласац и нікто од нас би не шмел дац свой глас тому за котрого зна же вон нас Руснацох не почитує, не признава, наше интереси заступац не будзе (мф)

Поляки и большевики.

До тераз у политики Поляки ше од страху пред Немцами тримали ведно зос Французами, а за кажди случай подтримовали дакус приятельство и зос большевиками. Але кед видзели же Французка ані зос пальцом не рушела да виратує Чехох — зрозумели же у подобним випадку Французка не будзе браніц ані Покьску. А ту бомє страх пред Немцами вельки, бо з єдней страни маю у своєй держави коло милион Немцох, на котрих Гитлер не забудзе, а друге видза же им под носом постала гоч малючка але здрава Подкарп. Украина, на котру ше вше буду обрацац тоти 7 милиони руско-українского народу цо живе под Польску державу. Отже требало даїдзе гледац помоци, бо цо зможе за випадок войны сама Польска проци 80 милионох Немцох. И нашли Поляки большевикох. Тих дньох обновели вони з нїма стару догварку взаїмней по̀моци за випадок войны або небезпеки. Гу тому „зограли“ тоту догварку зос новима обецунками „вичней любви и приятельства“ двох народох медзи собу. И тераз польски министер вонкашних дїлох п Бек ше рихта поїсц поклонїц Сталинови.

Лем єдну ствар забули панове Поляки же таку исту догварку зос большевиками мали и Чехи и же и Чехи ведно зос своїм председатєльом Бенешом цалу надїю зложели на большевикох, а и Бенеш ходзел до Москви да ше Сталинови поклонї, а цо з того вишло? И большевики ані з пальцом не рушили да Ческей у нужди поможу. Дзе нєшк: Бенеш и дзе велька ческа держава?

